

Zašto sam otišao iz Banje Luke

05/05/2009 12:45 by BanjaLukaSrcu

Boris Režak, banjalučki kantautor koji skoro godinu živio u Beogradu, nakon duže pauze u muzičkoj karijeri, izdao je novi album pod nazivom "Korak dalje".

Kaže da je novi materijal pravi proizvod iz njegove kuhinje i rezultat dugog rada.

Najveća radost

- Album, zaista, vrijedi poslušati. Mnogo je zreliji i bolji od prvog. Energičan je i pun emocija. Tekstove sam pisao skoro dvije godine. Radio sam i aranžmane tako da je cijeli album djelo mojih ruku, a to mi je, zapravo, najveća radost - kaže Režak.

Album ste izdali u vrijeme recesije. Brine li Vas, kao pjevača, ekonomska kriza?

- Osjeti se recesija, ali sam imao sreću kada je riječ o distribuciji CD-a na prostoru BiH. Album je, također, plasiran na prostoru Srbije i Crne Gore, a uskoro će se pojaviti na makedonskom i hrvatskom tržištu. Ljudi su pomalo isprepadani, ali siguran sam da je muzika ono što ih najviše uveseljava. Bilo je i gorih dana.

Zašto ste odlučili napustiti Banju Luku i odseliti u Beograd?

- Da imam građevinsku firmu ili da radim u nekoj agenciji ili, recimo, u "Elektroprivredi", vjerovatno ne bih otišao. Kako se bavim muzikom, Banja Luka mi ne daje toliko prostora da napravim blistavu karijeru. Jednostavno, Beograd je centar svih zbivanja, kako prije, tako i sada. U Beogradu mogu postaviti veoma dobre temelje. Želim da postanem dobar autor i pjevač.

Kako provodite vrijeme u Beogradu?

- U Beogradu sam našao oazu i mir. Živim na Košutnjaku, koji dosta podsjeća na Banju Luku. Priroda je lijepa i, što je bitno, imam dosta prostora za trčanje i sportske aktivnosti. Sve je mirno i stalno, što mi u potpunosti odgovara. Još nisam kupio stan, ali radim na tome. Unajmio sam i muzički atelje, to je moja radionica.

Nedostaje li Vam rodni grad?

- Ne toliko. Najviše mi nedostaje porodica, za koju sam veoma mnogo vezan. Nedostaju mi i moji prijatelji sa kojima sam odrastao. Trudim se da često dođem u Banju Luku i da ostanem koliko god mogu.

Planirate li nastupiti u Sarajevu?

- Iskreno, volio bih sutra, ali to nisu jednostavne stvari. Kada se nešto planira, onda se mora dobro i organizirati. Moram biti sto posto siguran da me sarajevska publika čeli i ne smijem riskirati. Ne osjećam još da u Sarajevu imam brojnu publiku tako da nije vrijeme da pravim nešto veliko.

Željivo

Koju muziku najčešće slušate?

BLUSRCU.BA - Stranica za sve banjalučane sirom svijeta!

<http://blusrcu.ba>

- U posljednje vrijeme nekako najviše volim slušati britansku muziku.

Koliko imate vremena za privatni život?

- Sve privatne stvari držim samo za sebe, isto radi svog mira. Želim da se ljudi interesiraju samo za moju muziku i za ono što radim.

Muzička scena je u kritičnoj situaciji

Da li sarađujete sa beogradskim muzičarima?

- Muzička scena je u kritičnoj situaciji. Bitno mi je da moj studio prima bendove i izvođače koji tek počinju muzičku karijeru. Želim im pomoći i podijeliti iskustva. Baziran sam na mlade umjetnike, na alternativne bendove. Ne želim lošu muziku, a u posljednje vrijeme takva je preovladala.

Autor: S. ALEKSIĆ

Izvor vijesti: Dnevni Avaz